



KERATAN AKHBAR DAN MEDIA ONLINE UNTUK MAKLUMAN :

**Y.B. MENTERI
Y.B. TIMBALAN MENTERI
Y.BHG. KSU
Y.BHG. TKSU (PDN)
Y.BHG. TKSU (PUP)
SETIAUSAHA AKHBAR**

13 JUN 2022 (ISNIN)



KEMENTERIAN PERDAGANGAN DALAM NEGERI
DAN HAL EHWAL PENGGUNA

KERATAN AKHBAR DAN MEDIA ONLINE (KPDNHEP)

13 JUN 2022 (ISNIN)



Bekalan terhad, harga daging dari India melambung

Johor Bahru: Selepas ayam segar, bekalan daging sejuk beku dari India pula dilaporkan semakin terhad dengan harga produk berkenaan dilihat turut melambung kira-kira 20 peratus.

Tinjauan di pasar basah sekitar bandar raya ini termasuk di Pandan, mendapati bekalan daging 'kotak' dari India dilihat tidak sebanyak seperti sebelum ini, manakala harganya naik kepada RM17 sekilogram (kg) berbanding antara RM13 hingga RM14 sebelumnya.

Peniaga daging, Hafizul Mohamad, 40, berkata daging dari India menjadi pilihan peniaga makanan dan pengguna kerana lebih murah berbanding daging segar tempatan, namun sejak sebelum Aidilfitri lalu, produk import itu yang diterima daripada pembekal mula berkurangan hampir separuh.

"Bekalan yang kami terima berkurang hampir separuh daripada biasa menyebabkan stok terhad. Keadaan semasa bekalan produk itu, terutama bahagian 'batang pinang' sudah mula ter-

putus menyebabkan peniaga makanan terutama peniaga sate dan pengguna mengeluh.

"Pembekal memaklumkan bekalan daging dari India sukar diperoleh sejak dua minggu lalu, malah peniaga daging kini juga sukar memperoleh tulang dan paru lembu dari Australia yang menerima permintaan tinggi daripada peniaga dan pengguna," katanya.

Katanya, walaupun harga daging import dari India naik antara RM3 hingga RM4 setiap kilogram, ia tetap lebih murah dan menjadi pilihan peniaga makanan serta pengguna berbanding daging segar tempatan berharga RM45 setiap kilogram yang hanya menerima sambutan ketika musim perayaan.

"Kini saya hanya terima 200kg daging import India daripada pembekal berbanding 400kg sebelumnya, jadi tak dapat tampung permintaan peniaga makanan dan pengguna," katanya dan turut diakui seorang peniaga daging di Pasar Taman Dahlia, Tampoi, Mohd Kamal Kamsan.

Mohd Kamal mengakui bekalan daging import India semakin berkurangan dan terhad sejak sebelum Aidilfitri lalu, namun tidak pasti punca sebenar melainkan makluman pembekal bahawa produk itu menjadi rebutan banyak negara.

Peniaga makanan, Mohammad Izam Seran, pula berkata kenaikan harga daging import India yang mendadak daripada RM215 sekotak kepada RM280 menyebabkan peniaga terpaksa menaikkan harga makanan berasaskan daging.

"Peniaga makanan, terutama nasi campur guna daging import India sebagai ramuan utama masakan berasaskan daging. Sekotak ada 20 paket, setiap paket 800 gram. Sejak harga daging India naik mendadak dua bulan lalu, saya terpaksa naikan harga makanan berasaskan daging sebanyak RM1.50," katanya.

Dalam perkembangan berkaitan, Timbalan Menteri Perdagangan Dalam Negeri dan Hal Ehwal Pengguna (KPDNHEP), Datuk Rosol Wahid memberi jaminan bekalan barangan asas termasuk ayam dan daging mencukupi bagi menampung permintaan sempena Aidiladha, bulan depan.



Rosol Wahid

"Pengguna tak perlu bimbang mengenai bekalan barangan asas. Kementerian Pertanian dan Industri Makanan (MAFI) memaklumkan bekalan berkaitan ternakan cukup, namun kami tetap memantau

pasar raya seluruh negara menerusi 2,000 penguat kuasa supaya tidak terjadi kekurangan bekalan.

"Kita tak mahu dengar maklumat sahaja tetapi tiada pantauan. Jika ada kekurangan bekalan, kita akan bincang dengan MAFI untuk pastikan stok mencukupi dalam pasaran," katanya

yang ditemui ketika meninjau Program Jualan Keluarga Malaysia (PJKM) di Lotus Tebrau, semalam.

Katanya, pemantauan bekalan bukan sahaja oleh penguat kuasa, tetapi turut dibantu persatuan pengguna dan rakyat yang boleh menyalurkan maklumat kepada KPDNHEP sekiranya mengesan kekurangan bekalan barangan asas di pasaran untuk tindakan segera.

Mengenai PJKM, Rosol berkata, program itu sehingga kini merekodkan hasil jualan mencecah RM54 juta menerusi operasi di lebih 1,702 lokasi seluruh negara termasuk Sabah dan Sarawak bagi membantu rakyat yang terkesan dan terbeban dengan kos sara hidup.

"Di Johor pula, sehingga 4 Jun lalu, PJKM telah dilaksanakan di 273 lokasi meliputi semua kawasan Parlimen dengan nilai jualan mencecah RM7.1 juta," katanya memaklumkan antara barangan tumpuan pengunjung adalah ayam segar, telur, minyak masak, gula, tepung dan sayur-sayuran.

KPDNHEP jamin bekalan mencukupi

JOHOR BAHRU – Bekalan barangan asas termasuk ternakan seperti ayam dan daging serta telur dijamin mencukupi bagi menampung peningkatan permintaan sempena Hari Raya Aidiladha bulan depan.

Timbalan Menteri Kementerian Perdagangan Dalam Negeri dan Hal Ehwal Pengguna (KPDNHEP), Datuk Rosol Wahid berkata, pihaknya dimaklumkan oleh Kementerian Pertanian dan Industri Makanan (MAFI) bahawa bekalan berkaitan haiwan ternakan mencukupi untuk permintaan tempatan.

"Setakat ini maklumat yang kami terima adalah rakyat tidak perlu bimbang dengan bekalan ayam atau daging kerana ianya mencukupi untuk menampung permintaan menjelang Hari Raya Aidiladha nanti, itu tiada isu.

"Sungguhpun begitu, kami akan teruskan pemantauan dan sekiranya terdapat kekurangan bekalan kami akan berbincang dengan MAFI untuk pastikan

mencukupi dalam pasaran," katanya.

Beliau berkata demikian kepada pemberita selepas melakukan tinjauan Program Jualan Keluarga Malaysia di Lotus Tebrau, di sini semalam.

Tambah Rosol, pemantauan akan dilakukan 2,000 pegawai dan anggota penguatkuasa KPDNHEP di seluruh negara bagi memastikan tiada kawasan sama ada di bandar dan luar bandar mengalami masalah kekurangan bekalan.

"Pemantauan bukan sahaja dibuat oleh anggota penguatkuasa tetapi turut dibantu persatuan pengguna dan rakyat, mereka boleh salurkan maklumat kepada kami sekiranya terjadi kekurangan bekalan di pasaran untuk tindakan segera," ujarnya.

Sementara itu, Rosol memaklumkan buat waktu ini pihaknya masih belum mempunyai perancangan untuk mengeluarkan skim kawalan harga sempena Hari Raya Aidiladha.



ROSOL (depan, tengah) ketika meninjau Program Jualan Keluarga Malaysia di Lotus Tebrau, semalam.

Bekalan keperluan Aidiladha mencukupi

KPDNHEP beri jaminan tiada kekurangan bekalan ayam, daging dan barang keperluan harian

Oleh ZULHISHAM ISHAK
JOHOR BAHRU

Kementerian Perdagangan Dalam Negeri dan Hal Ehwal Pengguna (KPDNHEP) memberi jaminan bekalan ayam, daging dan barang keperluan harian cukup sehingga Hari Raya Aidiladha bulan depan.

Timbalan Menteri, Datuk Rosol Wahid berkata, jaminan itu sudah diberikan Kementerian Pertanian dan Industri Makanan (MAFI) dan masyarakat tidak perlu bimbang mengenai bekalan barang harian tersebut.

"Kami dapat maklumat daripada MAFI bahawa bekalan mencukupi. Jadi, tiada isu. Bagaimanapun pemantauan di pasar raya seluruh negara tetap dilakukan oleh 2,000 anggota penguat kuasa KPDNHEP, supaya tidak terjadi kekurangan bekalan.



Rosol (tengah) meninjau harga barang asas termasuk ayam di pusat beli-belah Lotus Tebrau, Johor Bahru pada Ahad.

"Rakyat juga diminta segera menyalurkan maklumat kepada pihak kementerian sekiranya berlaku kekurangan bekalan di pasaran untuk tindakan segera, bukan memuat naik (dakwaan) dalam media sosial sendiri," katanya selepas melakukan tinjauan sempena Program Jualan Keluarga Malaysia di Pasar Raya Lotus Tebrau di sini pada Ahad.

Sementara itu, Rosol berkata,

pemantauan bukan sahaja dibuat oleh anggota penguat kuasa KPDNHEP tetapi dibantu oleh persatuan pengguna dan rakyat sendiri.

Dalam pada itu Rosol berkata, sehingga Ahad, Program Jualan Keluarga Malaysia merekodkan hasil jualan mencecah RM54 juta yang dilaksanakan sudah lebih 1,702 lokasi seluruh negara termasuk Sabah dan Sarawak sejak hujung tahun lalu.

Senarai Harga Barang Kebutuhan	
• Ayam	RM8.89
• Daging Lembu Tempatan	RM42.99
• Daging Lembu Import	RM28
• Telur Gred A	RM12.60
• Ikan Kembung	RM12.80
• Minyak Masak	RM6.50
• Gula Pasir	RM2.75
• Bawang Besar Holland	RM2.50
• Bawang Putih	RM5
• Cili Merah	RM12
• Kubis Bulat Tempatan	RM3.20
• Tepung Gandum	RM2.30

*Harga (RM/kg) Sumber: KPDHHP



KERATAN AKHBAR DAN MEDIA ONLINE (BERITA UMUM)

13 JUN 2022 (ISNIN)

Tiada lagi pemimpin Bersatu lompat parti

JOHOR BAHRU: Ahli Majlis Pimpinan Tertinggi (MPT) Parti Pribumi Bersatu Malaysia (Bersatu), Datuk Rosol Wahid menafikan akan ada beberapa lagi pemimpin parti berkenaan yang dijangka melompat parti selepas Datuk Zuraida Kamarudin.

Menurut beliau, perkara itu tidak ada dalam pengetahuannya kerana semua kepimpinan yang sedia ada komited dengan aktiviti parti termasuk barisan MPT.

"Setakat ini saya tidak dengar atau nampak ada, kerana Datuk Seri Mohamed Azmin Ali datang mesyuarat seperti tiada apa yang berlaku, baru-baru ini pun beliau masih datang mesyuarat MPT, semuanya 'okay'.

"Situasi itu berbeza jika dibandingkan dengan Zuraida kerana beliau memang sudah tiga empat kali tidak datang mesyuarat sebelum dia umum mahu keluar parti, Mohamed Azmin dan juga Datuk Mohd. Rashid Hasnon sebaliknya, mereka datang mesyuarat.

"Oleh yang demikian, saya nafikan desas-desus akan ada beberapa lagi pemimpin Bersatu yang akan mengikut jejak langkah Zuraida, kerana tiada tanda jelas perkara itu berlaku," katanya selepas melakukan tinjauan ke Program Jualan Keluarga Malaysia di pasaraya besar Lotus Tebrau, di sini, semalam.

Selain Zuraida, beberapa nama lain turut disebut-sebut



TINJAU... Rosol Wahid bertanya tentang harga ayam ketika hadir Program Jualan Keluarga Malaysia di pasar raya Lotus Tebrau, Johor Bahru semalam. - UTUSAN/RAJA JAAFAR ALI

akan mengambil tindakan sama termasuk Mohamed Azmin dan Mohd. Rashid yang menyertai Bersatu serentak selepas mereka meninggalkan PKR sebelum ini.

Namun Rosol yang juga Timbalan Menteri Perdagangan Dalam Negeri dan Hal

Ehwal Pengguna berkata, tindakan Ahli Parlimen Ampang itu tidak menjejaskan parti kerana jawatan Zuraida sebagai Ahli MPT adalah lantikan dan bukan disebabkan menang bertanding.

"Jadi saya harap tiada lagi kedengaran isu ini kerana fokus

setiap parti politik termasuk Bersatu sepatutnya adalah usaha untuk meningkatkan ekonomi rakyat dan membaiki kos sara hidup, itu perkara yang perlu diberikan tumpuan sehinggalah tibanya masa untuk Pilihan Raya Umum (PRU) akan datang," jelasnya.

Rosol nafi ada lagi ikut jejak Zuraida

Johor Bahru: Ahli Majlis Pimpinan Tertinggi (MPT) BERSATU, Datuk Rosol Wahid menafikan akan ada lagi pemimpin parti berkenaan bakal mengikut Menteri Perusahaan Perladangan dan Komoditi, Datuk Zuraida Kamarudin meninggalkan BERSATU.

Timbalan Menteri Perdagangan Dalam Negeri dan Hal Ehwal Pengguna itu berkata, pemimpin termasuk Menteri Perdagangan Antarabangsa dan Industri, Datuk Seri Mohamed Azmin Ali dan Timbalan Yang Dipertua Dewan Rakyat, Datuk Mohd Rashid Hasnon yang dikatakan bakal keluar parti, komited dengan perjuangan BERSATU.

"Seluruh pemimpin dan ahli BERSATU kekal fokus kepada isu rakyat dan pentadbiran parti. Setakat ini saya tidak dengar atau nampak ada (Ahli MPT akan lompat parti) kerana semua termasuk Datuk Seri Azmin dan Datuk Rashid datang mesyuarat seperti tiada apa-apa yang berlaku.

"Baru-baru ini pun mereka masih datang mesyuarat MPT, berbeza jika dibandingkan dengan Datuk Zuraida kerana beliau memang sudah tiga atau empat kali tidak datang mesyuarat sebelum mengumumkan keluar parti," katanya, semalam.